

5
DE VETERIS
GALLIÆ AC GER-
maniæ moribus ex C. Iulij
Cæsaris Commentario-
rum belli Gallici
lib. vi.

PARISIIS,

E Typographia Steph. Preuosteau, in via Aurigarum
e regione trium Crescentium.

~~2~~ M. D. XCIX.

2. Lib. 2

213177

213177

213177



213177

213177

213177



DE VETERIS GALLIÆ AC GERMANIÆ MORIBVS

ex C. Iulij Cæsaris Commentario-
rum belli Gallici lib. VI.

XIII-XIV

IN omni Gallia eorum hominum, qui in aliquo sunt numero, atque honore, genera sunt duo. Nam plebs pæne servorum habetur loco, quæ per se nihil audit, & nulli adhibetur consilio. plerique, cum aut ære alieno, aut magnitudine tributorum, aut iniuria potentiorum premuntur, sese in servitutem dicant nobilibus. In hos eadem omnia sunt iura quæ dominis in servos. Sed de his duobus generibus alterum est Druidum, alterum equitum. illi rebus diuinis intersunt. sacrificia publica ac priuata procurant, religiones interpretantur; ad hos magnus adolescentium numerus disciplinae causa concurrit, magnoque ij sunt apud eos honore. nam ferè de omnibus controuersis, publicis, priuatisque constituunt, & si quod est admissum facinus, si cades facta, si de hereditate, de finibus

A ij

controuersia est, ydem discernunt, præmia, pœnâsque constituunt: si quis aut priuatus, aut populus eorum decreto non stetit, sacrificiis interdicunt. hac pœna apud eos est grauissima. quibus ita est interdictum, y numero impiorum, ac sceleratorum habentur, ab ijs omnes decedunt, aditum eorum, sermonemque defugiunt, ne quid ex contagione incommodi accipiant: neque iis petentibus ius redditur neque honos ullus communicatur. his autem omnibus Druidibus præest vnus, qui summam inter eos habet auctoritatem. hoc mortuo, si quis ex reliquis excellit, dignitate, succedit; at, si sunt plures pares suffragio Druidum adlegitur, nonnunquam etiam de principatu armis contendunt. y certo anni tempore in finibus Carnutum, quæ regio totius Galliæ media habetur, confidunt, in loco consecrato. huc omnes undique qui controuersias habent, conueniunt; eorumque iudiciis, decretisque parent. Disciplina in Britannia reperta atque inde in Galliam translata esse existimatur. Et nunc, qui diligentius eam rem cognoscere volunt, plerumque illo, dicendi causa, proficiunt. Druides à bello abesse consueuerunt; neque tributa vnâ cum reliquis pendunt: Militiæ vacationem, omniumque rerum habent immunitatem, tantis

excitati præmiis, & sua sponte multi in disciplinam conueniunt, & à propinquis, parentibusque mittuntur: magnum ibi numerum versuum ediscere dicuntur. itaque nonnulli annos videnos in disciplina permanent: neque fas esse existimant ea literis mandare, cum in reliquis ferè rebus, publicis priuatisque rationibus Græcis literis utantur. id mihi duabus de causis instituisse videntur: quòd neque in vulgus disciplinam efferri velint, neque eos, qui discunt literis confisos, minus memoria studere, quod ferè plerisque accidit, ut præsidio literarum, diligentiam in perdiscendo, ac memoriam remittant. in primis hoc volunt persuadere. Non interire animas, sed ab aliis post mortem transire ad alios: atque hoc maxime ad virtutem excitari putant, metu mortis neglecto. multa præterea de sideribus, atque eorum motu, de mundi ac terrarum magnitudine. de rerum natura, de deorum immortalium vi, ac potestate disputant, & iuuentuti transdant. Alterum genus est Equitum, ij, cum est usus, atque aliquod bellum incidit, (quod ante Cæsaris aduentum ferè quotannis accidere solebat, uti aut ipsi iniurias inferrent, aut illatas propulsarent) omnes in bello versantur: atq; eorum, ut quisque est genere, copiiq;

amplissimus, ita plurimos circum se ambactos, clientésque habet. hanc unam gratiam, potentiâq; nouerunt. Natio est omnium Gallorum admodum dedita religionibus, atq; obeam causam, qui sunt affecti grauioribus morbis, quiq; in praliis, periculisque versantur, aut pro victimis homines immolât, aut se immolatu- ros vouët, administrisq; ad ea sacrificia Druidibus utuntur: quod pro vita hominis nisi vita hominis reddatur, non posse deorum immortalium numen placari arbitrantur: publicęq; eiusdem generis habent instituta sacrificia. alij immani magnitudine simulacra habent: quorum contexta viminibus membra viu- is hominibus cõplent; quibus succensis, circumu- enti flamma exanimantur homines. supplicia eorum qui in furto, aut latrocinio, aut aliqua noxa sint comprehensi, gratiora dijs immortalibus esse arbitrantur. sed cum eius generis copia deficit, etiam ad innocentium supplicia descendunt. Deum maximè Mercurium colunt: huius sunt plurima simulacra: hunc omnium inuentorem artium ferunt: hunc viarum, atque itinerum ducem; hunc ad questus pecunie, mercaturęque habere vim maximam arbitrantur. post hunc, Apollinem, & Martem, & Iouem: & Mineruam. de his eandem ferè, quam

reliqua gentes, habent opinionē; Apollinem, mor-
bōs depellere: Minervam, operum, atq; artificio-
rum initia transdare: Iouem, imperium caelestium
tenere: Martem; bella regere, huic, cū pralio di-
micare constituerunt, ea, quæ bello ceperunt, plerūq;
deuouent: quæ superauerint animalia capta im-
molant: reliqua sūq; res in vnum locum conferunt;
multis in ciuitatibus harum rerum exēluctos cu-
mulos locis consecratis conspiciari licet: neque sæpe
accidit, vt, neglecta quispiam religione, aut capta
apud se occultare, aut posita tollere auderet: gra-
uissimūmq; ei rei suplicium cum cruciatu constitu-
tum est. Galli se omnes ab Dite patre prognatos
predicant: idque ab Druidibus proditum dicunt
ob eam causam spatia omnis temporis, non nu-
mero dierum, sed noctium, finiunt, & dies nata-
les, & mensium, & annorum initia sic obseruant
vt noctem dies subsequatur: in reliquis vitæ insti-
tutis hoc ferè ab reliquis differunt, quod suos libe-
ros, nisi cū adoleuerint, vt munus militia susti-
nere possint, palàm ad se adire non patiantur: fi-
liūque in puerili atate in publico, in conspectu
patris assistere turpe ducunt viri: quantas pecu-
nias ab vxoribus dotis nomine acceperunt, tantas
ex suis bonis, æstimatione facta, cum dotibus com-


municant. huius omnis pecunia coniunctim ratio habetur, fructusque servantur. uter eorum vita superarit, ad eum pars utriusque cum fructibus superiorum temporum peruenit. viri in uxores, sicuti in liberos, vita, necisque habent potestatem, & cum paterfamilias, illustriore loco natus, decessit; eius propinqui conueniunt, & de morte, si res in suspicionem venit, de uxoribus in seruilem modum questionem habent: & si compertum est igni, atque omnibus tormentis excruciatas interficiunt. funera sunt pro cultu Gallorum magnifica, & sumptuosa: omniaque quæ uiuis cordi fuisse arbitrantur, in ignem inferunt, etiam animalia: ac paulò supra hanc memoriam, serui & clientes quos ab ijs dilectos esse constabat, iustis funeribus confectis, unà cremabantur. quæ ciuitates commodius suam remp. administrare existimantur, habent legibus sancitum, si quis quid de Repub. à finitimis rumore, aut fama acceperit, uti ad magistratum deferat, nève cum quo alio communicet: quòd sæpe homines temerarios, atq; imperitos falsis rumoribus terreri, & ad facinus impelli, & de summis rebus consilium capere cognitum est. Magistratus, quæ visa sunt, occultant: quæq; esse ex usu iudicauerint, multitudini produnt. de Repub.

nisi

nisi per consilium loqui non conceditur. GERMANI multum ab hac consuetudine differunt: nam neque Druides habent, qui rebus diuinis præsint, neque sacrificiis student: Deorum numero eos solos ducunt, quos cernunt, & quorum opibus apertè iuantur, Solem, & Vulcanum, & Lunam: reliquos ne fama quidem acceperunt. vita omnis in venationibus, atque in studiis rei militaris consistit: ab paruulis duritiei, ac labori student, qui diutissimè impuberes permanserunt, maximam inter suos ferunt laudem: hoc ali staturam, ali hoc vires, nervosque confirmari putant; intra annum verò xx. fœmina notitiam habuisse, in turpissimis habent rebus: cuius rei nulla est occultatio; quod & promiscuè in fluminibus perluuntur, & pellibus, aut paruis rhenonum tegumentis vtuntur, magna corporis parte nuda. Agricultura non student; maiôrque pars victus eorum in lacte, & caseo, & carne consistit: neque quisquam agri modum certum, aut fines proprios habet: sed magistratus, ac principes in annos singulos gentibus, cognationibusque hominum, qui unà coierunt, quantum eis & quo loco visum est, attribuunt agri; atque anno post aliò transire cogunt. eius rei multas afferunt causas; ne assidua consuetudine capti, studium

belligerendi agricultura commutent; ne latos fines parare studeant, potentioresque humiliores possessionibus expellant; ne accuratiùs, ad frigora, atque æstus vitandos, ædificent, ne qua oriatur pecunie cupiditas, qua ex re factiones, dissensionésque nascuntur, ut animi æquitate plebē contineant, cum suas quisque opes cum potentissimis æquari videat. Ciuitatibus maxima laus est, quàm latissimis circum se vastatis finibus solitudines habere. hoc proprium virtutis existimant, expulsos agris finitimos cedere, neque quemquam prope se audere consistere. simul hoc se fore tutiores arbitrantur, repentinæ incursionis timore sublato. cum bellum ciuitas aut illatum defendit, aut infert: magistratus, qui ei bello præsent, ut vita necisque habeant potestatem, deliguntur. in pace nullus communis est magistratus, sed principes regionum, atque pagorum inter suos ius dicunt, controuersiásque minuunt. latrocinia nullam habent infamiam, atque extra fines cuiusque ciuitatis sunt: atque ea iuuentutis exercenda, ac desidia minuenda causa fieri prædicant. atque, ubi quis ex principibus in consilio se dixit ducem fore, qui sequi velint profiteantur, consurgunt ij, qui eius causam, et hominem probant, suumque auxilium pollicentur, atque ab multitudine col-

laudantur: qui ex ijs secuti non sunt, in desertorum, ac proditorum numero ducuntur: omniumq; rerum ijs postea fides abrogatur. hospites violare, fas non putant: qui quaq; de causa ad eos venerunt, ab iniuria prohibent, sanctosque habent; ijs omnium domus patent, victusque communicatur. ac fuit antea tempus, cum Germanos Galli virtute superarent, & ultro bella inferrent, ac, propter hominum multitudinem, agriq; inopiam, trans Rhenum colonias mitterent. itaque ea, que fertilissima sunt, Germania loca circum Herciniam siluam, quam Eratostheni, & quibusdam Græcis fama notam esse video, quam illi Orciniā appellant vulgò, Tectosages occuparunt, atque ibi consederunt. quæ gens ad hoc tempus ijs sedibus se continet, summamque habet iustitiæ, & bellicæ laudis opinionem. nunc quod in eadem inopia, egestate, patientiâque Germani permanent, eodem victu, & cultu corporis utuntur: Gallis autem propinquitæ & Transmarinarum rerum notitiæ, multa ad copiam, atque usus largitur, paulatim assuefacti superari, multisque victi prælijs, ne se quidem ipsi cum illis virtute comparant.



F I N I S.

